

Član 64.
(Rad po osnovu izdate radne dozvole - PB/5)

(1) Radna dozvola je dozvola za plaćeni rad stranca na određenom radnom mjestu ili za određenu vrstu poslova, u određenom vremenskom periodu, a najduže do jedne godine, koju na zahtjev poslodavca (pravnog ili fizičkog lica koje namjerava zaposliti stranca) izdaje organ nadležan za poslove zapošljavanja u Bosni i Hercegovini.

(2) Stranac koji ulazi u Bosnu i Hercegovinu po bezviznom režimu ulaska, a ima namjeru podnijeti zahtjev za odobrenje privremenog boravka u Bosni i Hercegovini po osnovu izdate radne dozvole, mora imati radnu dozvolu u vrijeme ulaska u Bosnu i Hercegovinu, odnosno radna dozvola mora biti starijeg datuma izdavanja od datuma ulaska stranca u Bosnu i Hercegovinu, odnosno ulaznog štambilja unesenog u pasoš stranca.

(3) Stranac koji namjerava ući u Bosnu i Hercegovinu sa vizom za dugoročni boravak (Viza D) dužan je pribaviti radnu dozvolu prije podnošenja zahtjeva za izdavanje vize.

(4) Uz zahtjev za odobrenje ili produženje privremenog boravka po ovom osnovu stranac je dužan, pored dokaza o ispunjavanju općih uslova za odobrenje privremenog boravka iz člana 53. Zakona i člana 58. ovog Pravilnika, dostaviti:

- a) radnu dozvolu izdatu od strane nadležnog organa za zapošljavanje u Bosni i Hercegovini,
- b) potvrdu ili uvjerenje nadležne poreske uprave o regulisanim poreskim obavezama u Bosni i Hercegovini, a gdje je potrebno i dokaz od strane Uprave za indirektno oporezivanje o izmirenim obavezama po osnovu indirektnih poreza, ne starije od 30 dana ili ugovor ili sporazum sa poreskom upravom ili upravom za indirektno oporezivanje o plaćanju neizmirenih obaveza u ratama.

(5) Uz zahtjev za produženje privremenog boravka po ovom osnovu stranac je dužan priložiti i potvrdu nadležnog organa za zapošljavanje o predatom zahtjevu za produženje radne dozvole.

(6) Nakon odobrenja privremenog boravka po ovom osnovu poslodavac i stranac zaključuju ugovor o radu ili drugi odgovarajući ugovor, koji je poslodavac dužan da dostavi Službi najkasnije u roku od tri dana od dana prijema rješenja o odobrenom privremenom boravku.

(7) Stranac može raditi u Bosni i Hercegovini samo na onom radnom mjestu ili na onoj vrsti poslova za koje mu je izdata radna dozvola, odnosno samo kod onog poslodavca s kojim je na osnovu radne dozvole zaključio ugovor o radu.

(8) Odobrenje privremenog boravka izdaje se na period 15 dana duže od važenja radne dozvole uz uslov da je važnost pasoša stranca duža za tri mjeseca od perioda boravka, a najduže do godinu dana.